

陳太史無夢園初集

武舉錄序

天子登極之元年秋九月都試郡國材官介士
大司馬奉 俞功令加毖觥角組轡可筋骨膽
力求也劒履之及氣摩青雲其曉忠孝大義恬
澹爲上吹律測之繫右籍則闡而問方略

上命臣仁錫臣紹賢往偕都給事中臣允儒右
給事中臣承業主事臣橋臣有聞共襄厥事臣
舍珥筆問戎行又稱主者甚懼已深惟儼狃罕
開之屬蠢蠢匪茹授韎韐以毛錐善射而有辭

矣天下安危所注意臣與諸臣敢不齋戒簡迪
用對揚

天子威命旣取士一百人以獻臣以職事宜
叙首簡臣聞練士節制尚矣進而六千之君子
共勞苦進而三千之一心共祗懼又進而十人
之同心同德共者定以仁人親之以腹心比之
以孝友飲御之誠貴禮而重報也謬哉使貪使
詐金在懷馬在廐而亦在其頸是忠孝恬澹者
心膂之至寶營便利田宅者性命之至讐也義

利鏞錠多士豈武也而忽諸且士亦知報之義
乎報恩易報德難報禮尤難禮內心之精微以
少爲貴者也致恭存位匪勞謙君子孰能終之
郭汾陽擢武科醮而祝士者高引爲格人元龜
其事君大節一遵禮度蓋師貞之丈人歟臣讀
易師九二在師中吉无咎王三錫命象曰在師
中吉承天寵也王三錫命懷萬邦也千古遺將
之文也懷萬邦之道三曰敬

天曰法

祖曰恤民

皇上聖敬日躋克自抑畏 命中外表奏特尊

天地 祖宗不敢竝 平臺 召對 文華

裁決諄諄苦田賦加派漕輓逾期 盛德至計

無已粵稽洪武天下飛奏災異著爲令遇風霾

輒飭邊庭頃月蝕申儆

皇上召廷臣下 明詔勤修省至粟貴十年饑

決萬戶地以震告旣聞耳矣咨爾盡精厲氣無

薄陰陽之和何以報屯鹽裕軍興京營嚴戰守

水利關隘坑漕規載典則盡濶略壞法亂紀而蓄無益之戎行飯不戰之塚卒與傭賈謀居圉士暴憤也憤盈而決之

皇上以力行爲法

祖政繇舊咨爾敢勇深入懸甸奴頭豪街蠻吏邸間飲至告歆何以報自議徵兵三十萬司農始加派今見兵有額郡國那移正供逋欠日甚貪吏吸加派之腴閭左受加派之困 國家冒加派之名

皇上專用恤元元爲憂咨爾貧破其衆省海內
佗負輸將之費厥賦貞何以報聞斯言也流汗
相屬

天地清寧之宇宙必不肆薄蝕於腥羶

祖宗櫛沐之封疆必不淪尺寸於異域舍生之
類扶老攜幼謳吟燕凱之聲殷號相答然後類
於

上帝禋於

祖宗酬

天子宵旰萬分一非爾陣交禦定之

能事耶師尚父曰大明發而萬物皆照又曰大哉聖人之德獨聞獨見樂乎哉

皇上乾斷離照伐暴除克醜虜必克昧昧我思之剖符延世爾公爾侯所自樹也審獨聞獨見之注嚮愜仁人君子之抱懷斯樂已臣仁錫神祖顯皇帝丁酉所舉士也閱九試而中天啓之壬戌繇是感激知遇殫心講筵朴愚硯執屏伏田野

皇上采廷臣言首荷環召俾理誥勅秩官

察與觀桓桓矯矯之盛以人事 君冀得當以

報多士能縛名王擒貴人交臂誦膝連綴而致之 闕下臣庶幾載筆磨錦勒燕然茲籍爲噉矢報之義共交勗哉知武舉者兵部尚書臣在晉左侍郎臣邢華同知武舉者寧陽侯臣光裕惠安伯臣慶臻遂安伯臣偉寧晉伯臣天錫崇信伯臣天澤安寧侯臣祚昌臨淮侯臣弘濟定西侯臣惟恭襄城伯臣守銓誠意伯臣孔昭監試則御史臣心一臣師襄法得備書右春坊右

中允兼翰林院編修陳仁錫謹序

策問一道

問國家都燕薊宜大最重嘉靖間三衛勾虜四
犯薊撤我古北喜峯藩捍西虜三部坐大其寧
遠至河東者曰插漢食賞廣寧淫昏而貪狡歲
設防自遼陽不戒疆吏苦心轉用之偵東虜插
爲賞首白彥台吉次之今挿大殘雲中餘部與
奴姻連並耕牧虜已合矣用讐則憤勵俺族屬
足當虜而我自以全力制奴收四衛復遼廣嚴
備降胡便宜屯田識者謂能禦東虜而後西虜

之款可信海上虛着未足狃也然歟蓋邊圉固
則京師安庚戌虜自宣府循潮河川南下至
古北別從間道西出黃淪溝卽奴謀合西虜窺
薊宣之入路也其時一稟廟算而四顧京營
將驕兵冗反調邊兵入援畿輔宣雲大震嗣後
非楊博環甲登陣宿古北扼絕險輔臣徐階請
先備順義以奇兵邀之疆事亦孔棘矣

孝宗敬皇帝與劉大夏議設東西二衛蜚語不
爲動當是時欲出三萬之師援大同猶圍營餘

勁也茲欲修薊鎮敵臺車營施之宜大諮郭登
周尚文戚繼光等守三鎮遺法以漸行之諸邊
遵五軍營十二團營邊戰將練精兵禁班軍工
作同與操肄以漸行之郡國責撫按督守令偕
衛所官蒐簡以殿最報俾沿邊皆可戰之士天
下無不練之兵兵精則餉易足洵救時急策也
詩曰苞有三蘖莫遂莫達黔蜀閩浙間所在通
誅鍾鼓宜聲名器堪惜掃奴而截蘖大休民力
諸士憤發言之仰佐

聖神文武之勤懋襄削平勘定之畧

第一問

今夫防邊壯圍制奴馭虜掃蕩安天下之道三
曰實曰漸曰久

太祖高皇帝謂武臣曰本固而戰多勝少敗何
謂本內是也內欲其實實則難破有備是也

宣宗章皇帝諭侍臣曰自古無中國清明而有
外夷之禍者竭天下戰一奴垂數年內者甲兵
頓蓄積虛外者虜比志甚固奴死奴饑不以此
時掃穴係頸竊恥之且不守廣寧則中後寧錦

山海非吾有不復遼陽收四州則廣寧非吾有
遼陽不守則陸走薊門水走天津在所設防此
其計不再決若屯田不繇中制必無寧遠亂卒
之事畜插以後不輟欵撫不易經臣必無闡入
大同之事東江處置得宜文武經理必無望洋
問若之事邊璫不提劒橫行必無餌我棄地蹂
屬國犯寧錦之事三方不布四路不出三十萬
之兵不派降胡不受金錢不濫必無覆軍殺將
加賦召募之事道將守令皆高其選必無尸厥

官之事毛乞炭軍討行必無小夷搶攘之事滅
安酋禦閩寇必無東浙滋蔓之事此其轍不堪
再誤粵稽嘉靖三十年之虜釀一貪局戰天下
不休今十年之奴釀一欺局亦戰天下不休昔
貪局主仇鸞賄虜市虜而後已於是逆鸞傳首
九邊天表之應俺荅來臣享數十年清淨之福
今欺局主逆璫欲殺盡天下忠臣義士其強項
邊吏則木索對簿受笞盜左藏私封拜於是逆
璫豪首街衢天表之應四方底定受千萬年保

佑之命茲正會朝清明之日奴襲授首之期也
皇上勤勞天下憂苦萬民速賞必罰至矣雲徹
席卷夫何疑哉惟能制東虜而撫款可備一策
今三衛非昔比福餘越遼河而太寧牧錦義廣
寧間自喜峯隣宣府曰朵顏昔三衛也小王子
土蠻遷東方徙虜福餘界外據其地反青抽扣
兒拱兔屬插最强福餘世仇插僻遠而朵顏積
衰服屬哈喇慎受賞十台吉部下今三衛也號
三十六家則朵顏裔也插大部東北接奴無金

白爲之限小部踞寧廣青山屬尊而悍妻女弟
戕季父自黃台吉絕其貢卜哈沮其使於是鳴
鏞相向致白酋死大殘我雲中是又一奴也白
弟恥借奴兵甚義可使永邵卜所部強我能勵
各部獎率忠義奴卽賄山後夷巢拱兔帳而大
興降胡一帶可間諜然插不爲奴用亦驚然自
用東部如此意者近撫三十六營專衛薊彼賤
且微族繁盍少闊畧無拘于小文無費十而愛
一奴犯薊絕其導奴插合一軍軍薊一軍軍宣

大裨離散其黨與視撫東部難易相百也蓋謀
國有經有權三衛逼處近畿故永樂有屈烈河
之師而三犁虜庭常從獨石開平出兵實欲拓
外邊移之能一戰復大寧與宣遼並峙自漁陽
接山後省乘障修邊之費上也不能則用漸法
姑示羈縻勿絕徐階謂治其勾引不若責以扞
圉失職使彼易受而楊選執通罕二子係薊獄
益開邊隙鑒諸試再證前事俺荅失孫辛愛失
一也王襄毅真實心爲國虜遂歸趙全弄其

孫旃裘之下邊垂無事李順侵餉飾功虜詒歸
丘福斬其妾諸婦之前師武蒙羞疆事之貴實
如此俺荅城下嫚書徐階請易番文從大同守
臣進緩敵以固備貴漸也順義之款王襄毅主
之張文忠高文襄決之文襄奏歲遣大臣省臺
閔視守邊與馘斬同功失機同罪十年修築以
款修戰貴久也茲正施德丰部申固約束之一
會矣三者備奴揔可令可離彼無所不攻我無
所不守雖然必急薊門嘉靖間虜收伯言帖忽

諸部而古北口孤牧影克脫力思諸部而冷口
喜峯孤牧流河諸部而馬蘭孤庚戌自宣府循
潮河川南下至古北從間道出黃淪溝潰墻入
嗣後乙卯犯薊

世宗肅皇帝遣察狀見督臣楊博掇甲披胄宿
止古北口垣上千是發金錢犒守城卒博及大
將各衣一襲癸亥虜阻白水河退掠香河輔臣
徐階請先備順義以奇兵扼之古北虜果走順
義

孝宗敬皇帝御煖閣出大同鎮巡奏謂輔臣曰
京軍已選聽征二萬別備一萬劉健劉大夏等
曰北虜與朵顏通潮河川古北口爲急不果行
是古北潮河者虜必入必戰之地也薊兵守內
口宣兵守外口大同得其情宣府得其形急薊
併急宜大竊有感三大將云郭登守大同士可
戰者數百馬百餘匹登糾募畜養不幾年馬萬
五千匹精兵數萬設撓地龍飛天網鑿深塹覆
土木賊入圍發機自相擊陷其遺法有存者尚

文追通虜表文擒之殺滿竿宣府永寧之戰斬其殿繼光練浙兵三千充教師謀練兵六萬出塞已益兵僅二萬不一當虜將軍有餘憾焉甚哉乎塞垣之急也建敵臺一千二百座士卒經年不離臺宿法甚具讀傳烽歌天下壯之尚文築鎮口邊墩五十里補牆堡七百所大同平曠可教車茲戰氣破傷良可憤痛五堡之築毛司馬竟之邊牆之議楊襄毅竟之試以邊垣修圯爲邊臣殿最如內邊外邊緩邊急邊及關梁障

塞置室居人練人用砲其下可田墩兵墾之誠
守三鎮至計云蓋三將軍孳孳愛國務實思念
至於遼遠務漸俾卓然可觀務久而將登則于
謙將尚文則翁萬達將繼光則譚綸謙居本兵
日與郭登羅亨信披甲往來至匡飭也萬達分
地乘障硃署堡壁下守者已各面縛無敢去障
如薊卒無敢去臺至嚴翼也寇薄居庸尚文老
矣得檄馳赴力戰三日夜萬達率壯騎赴之虜
大驚解圍去至壯武也綸立薊門三大營繼光

督之與士卒手調醫藥人人願爲盡力有能立馬鐵鳳城上南引金復海蓋之粟以犒師庶竟少保萬一乎無僅曰疋馬不入其令鴛鴦其陣敵臺車營其制也哉夫邊兵易腹兵腹兵易京兵京兵易南兵而練兵則士貴士貴則將嚴重此繼光有以兵練將之說嘉靖設三大營不遵末樂五軍營之舊乎于謙令三營六督推其二爲總兵以本兵董之張聰楊一清請用戰將於選能戰之將六員不遵團營之舊乎勳爵自

因其故戰將以時權設周尚文不嘗提督京營
乎操法五日之內陣馬三日射藝二日卒不再
更以防代替可做行乎第今牧馬艸場半沒弓
刀外解半窳弊久矣有漸則不驚意者勿遽減
原餉勿遽索盈伍專責練士四萬陰厚其精一
切頂替或明著踐更或漸令暗補弱者漸補強
老者漸補壯道里遠者漸補近卽無望出征而
可資以守一旦有急不至若嘉靖調邊兵七萬
又選六萬八千與京營襍練使大敵臨邊懦將

提兵逕出藉口入援之已事也嗟乎一實概之
矣漸與久行事次第耳葉盛請急遣居庸宣府
兵還鎮邊人大安羅亨信持劔立宣府城上手
刃出城者非實耶庚戌將驕兵冗遠卒提弊衣
而至牛酒之犒文移往復非不實之患耶班操
初制射牌高與人齊射三百步外簡銳分屯量
饋以納班之金宜厲精更始自班兵傭邊兵無
不傭京兵占邊兵無不占率納班買閒詭冒侵
役爲常而健丁護將吏以我下騎當敵上騎戰

謀兩誤烽火不明兵死餉亦死馬死芻亦死旗
亂輒靡不大創不止衛士不習武藝責所領官
著爲今天下撫按督守令與衛所互簡蒐上下
其考以聽黜陟無用之兵去可以抵餉不練兵
之官去可以裁武漢永和之役第簡賢能爲刺
史太守嶺外平可法已

孝宗謂劉大夏京輔左右肘腋各宿兵其地大
夏請以保定操卒萬人還之鎮爲西衛東兵納
之密雲薊鎮爲東衛蜚語揭騰不爲動丘濬議

以宣府爲北府俾守北門東以永平爲輔守松
亭遼左關隘西以易州爲輔守紫荆南以臨清
爲輔坐鎮牐河總扼河南山東之衝南屯兵於
徐州通兩京咽喉噫燕趙沈鬱復產健馬以漸
行之八府子弟有司以意訓練如弓箭社自成
一軍乎嘉靖倭寇五十餘人轉掠應天四十八
衛無一出戰卒夷於竈丁可法已天下最苦餉
郭子儀憂地廣勢分願收諸道精卒五萬分屯
北邊葉適言張俊岳飛等屯兵三十餘萬歲給

錢六千餘萬緡米絹不與欲精其軍使各不過三四萬省東南民力甚善兵精則自汰汰則以所贏之糧補所缺之額厚所練之兵餉不患不足兵精而餉足何憂虜試下一檄曰安酋殺無赦滇進霑益蜀進烏江粵出一師以連麻哈泗辰之夷楚通一線以濟師黔緜六廣彼前有巖江削壁後有島蒙部落諸司中深菁洞時怒黔時緩蜀時誘煽諸苗亦窮矣又下一檄于閩浙曰海寇殺無赦已撫者歸我叛人否則勦之邊

例請撫者罪噫孔子作春秋奉名義而已安得
不惜繁纓今兵食兩訕尊紀綱而已安得不惜
官爵自古盜賊與窮民合憂不在虜下天下無
不練之兵則天下無不盪之寇有如期月課實
情三年課實政中外興除皆以三年爲限實斯
漸漸斯久久道化成與天無極生請咏商頌相
土烈烈海外有截桓撥之盛也敷政優優百祿
是適

聖神文武之上筭也

第二問

御臣之道使無欲難置之無可欲無敢欲易惟
上所置難自置之無可欲無敢欲易人臣置已
于有欲甚難而置已于無欲反易以律武臣不
太過歟曰非也士有志節而後有出處有出處
而後有生死武士有死無二而後有事業故夷
狄患難造次顛沛非人生偶然之遭乃自得之
地也又武士快心之地也士何求哉居鄉不求
于竿牘居官不求于鐘鼎居方寸不求于聲譽

居夢寐不求于鬼神故置身無欲甚易而有求甚難士無求趨其易云爾一失足千古恨矣一失身天地毀矣戰國說士甚有口旁人睨之不過三十萬金豪傑盡能無悲乎噫輕世肆志仲連所以傲然自命天下士而不疑也彼且蹈東海死耳豈從來不愛錢之人卽不惜死之人耶雖然士無欲也人欲之名教欲以爲砥柱渡江河欲以爲維楫奉辭伐暴之主欲以爲仁人君子戰死扶傷想魂萬里之外欲其爲無辜額天而

士一失望介如石焉僞也峙如山焉埳也故置
身有欲甚難且世俗之所欲何物也有鬼神以
司之有斧鉞以臨之鬼神之所不司何不可欲
其鬼神焉司之何可欲斧鉞之所不臨何不敢
欲其斧鉞焉臨之何敢欲師老十年纍纍垂索
無鬼神無斧鉞哉有之自今日始雖然可以得
中士不可以得上士詩不云乎有嚴有翼共武
之服有欲不可治無欲少欲不可治多欲惟敬
治之禮將力將止欲將一也止欲必有禮有禮

而恥生有恥而力生王嘉曰士有材能甚少宜
預蓄養無事事倉卒乃求噫士不患不賢而患
不能不患不能而患不情說在蕭鄼侯何與李
將軍陵鄼侯收秦圖書轉輸關中不絕可謂能
計天下已定諸事草創而便利田宅自污此一
念已不忠是不情于君臣也天下無能人也陵
自守奇士張空拳冒白刃可謂能將而回面事
虜使其友自宮又失言君父之前是不情于朋
友也天下無能人也人必度其君度其友度其

身不情于如此之君臣如此之朋友而無具甚
矣史稱陳平受金高帝縱之金平金人乎哉燕
居深念調和將相是有情漢室之人也趙奢爲
將賞賜悉予軍吏士大夫其妻弗怪也括私賜
金帛其母怪之括不情于母子也故不情于趙
王李允則之築大城也愚其民于獄祠又愚之
捕盜卒以版築護祠以祠城甕俾有寧宇也情
于甕城父老子弟他若牧饗士士不有其身起
吮卒母不有其子去病匈奴未滅不有其家非

情至孰能與于此世衡懸銀的教吏民習射情
于禦盜李愬斥倡優護病卒而莊事裴度情于
上臣曹彬不以官酒私太祖情于舊主故曰愛
爵賞百金而不取人之情者不仁已不情安能
取人之情且富貴非一家物公諸天下富貴亦
非天下物還之人主天不可久負耕夫紅女不
可奪賈人百萬不足與計事雖然此寥廓而獨
寐者耶可以得無情之士不可以得有情之士
文武一也束手受書博誦幾何上馬殺賊下馬

作檄幾何守缺係殘專已綴學傷哉貧也如耕
石田有一物焉挾之以去多金而已故士有四
儲一儲學一儲氣一儲義命一儲道德有學而
無氣孱夫也有氣而無義命無道德寡人也天
之造人維義與命無義無命天所不材君安使
之知義命計不旋踵斷死不顧計先定也見
宇宙名利之心揭膽肝作忠孝之氣非有道德
人也歟哉如鑄劍焉狀類高山深淵而後太乙
下觀夫劍鐵耳固能有精神若此

太祖高皇帝與侍臣關孫武使貪使詐之說曰
量敵制勝智勇兼盡豈可謂愚攻城野戰捐軀
殉國豈可謂貪若果貪愚之人不可使也

上召對亟稱宋文臣不愛錢武臣不惜死二語
責武臣首責文臣繩小貪先繩大貪生愚以爲
國有二大儲焉一曰儲人一曰儲利儲人之道
三曰儲撫臣儲道臣儲壯縣邊縣之令儲利之
道三曰儲屯儲鹽儲京東江南水利

祖宗廓清之烈神氣壯隆又賴楊文貞東南重

賦宜恤一語久任巡撫一策洪宣成弘間封殖
數十年維時周忱于謙等久者至二十二載今
不滿三歲輒遷其病徒文具耳誠得非常之人
六年始代而責之以事代者代其人并代其事
三載加秩焉道臣如高文襄議遴異材除授兵
部專備邊道之缺劾則躋巡撫使尊重難危人
地位望相得天下生民係于今以壯縣邊縣爲
一籍冢宰定其論入告而後授之令亦不以師
存故旁瞬左右顧而竭智盡忠行能高妙苟有

眞賢能二百餘人分布海內是國家蓄二百餘
名將也塞上以築垣練兵積穀清屯遏寇盜爲
最內地以興水利墾荒蕪散盜賊減鞭朴而催
科不拙爲最有政事何患無財用今之筋骨神
明皆財也天下皆得人是得百千萬筋骨神明
之財也禁迎送絕煩苛威權不奪而後臨難仗
節三歲上其最優以行取六年陞轉如是而有
人矣請儲財一曰儲屯洪武諭屯兵種棗栗廣
募受屯者給公田東勝衛虐屯卒論斬而餘糧

之減半正糧之免交盤改本爲折始壞法屯之
盛也太寧松亭開會州寬河儲二百萬石永樂
間給牛種頒田式墾荒不起科寧夏積穀獨多
今田增而糧減曰疆界也豪強也逃貧也戎馬
克斥也獨無屯用可仗豪右按年賠糧及自首
免賠之令歟以宣大言之商輅奏田卒互耕操
蔣琬奏清腴田數十萬嘉靖間臺臣專買二鎮
糧草今粟與草爭貴兵革相乘忍阨脫耶借曰
寇至彼田塞下之晁錯繆矣棗祗趙克國鄧艾

羊祐郭元振李泌韓重華皆謬歟葉盛撫宣府
墾田多買戰馬修城堡李承勛巡遼見故興水
縣地肥美立三大營以耕瀋陽地尤美則築墻
創臺防虜之入皆過計歟噫虜多方誤我我又
多方自誤官冗兵脆乳犢小民有公派有私派
而軍屯任其廢業不平謂何無亦思年例盈三
百餘萬額外征討五百萬至于今太倉太僕公
私之積有幾亟以屯政責成撫按撫按責部帥
將自耕以倡所部計田頒賞優復業之令開贖

罪之條均寄籍之法除草場馬場之名色省養
馬商人之苛政卽未能復地還軍而亦宜派糧
歸地柰何哉官種民種餘丁種皆不辨歟酒心
自新制吾棄財無令天下大屈一曰儲鹽兩淮
壅引數十萬邊引三年不售浮課僞引莫之鈎
較貧竈困總摧之手大買入敝惡之繪關說甚
于奏討開納滋蔓請求買寓賣寓鹽引犒樂工
伶人而不問鹵地草場刀俎供富室豪商而不
問自變輸粟引價昂而不問鈔法不行無法處

餘鹽而不問初制商人納粟二斗五升利商亦
利屯卒而不問寧夏便粟而不問東粵蜀閩地
廣而不問唐蒲解安邑歲供京師解鹽近二邊
今賦少員濫而不問絞刑不止乃開贖刑官軍
送出境而不問滄州鹽直廉給價回空糧艘揚
州爲貯倉常股存積悉與見鹽亦哀益一術而
不問鑒于唐第五琦斗鹽加百錢劉宴因民所
急罷稅禁堰曉道倍于勸農初僅四十萬緡季
年乃得六百萬緡及陳少游包估侈高估李琦

盛貢獻其法大壞李巽始歸度支信哉用人急
矣霍韜議選兩淮漕運及三邊總督都御史如
左右手講求鹽屯之法聽自擇鹽官三年詔賞
罰蓋至論云一日儲京東江南水利薊隔一墻
依垣而守地濶人稀興水利以限戎馬郭守敬
治水故道斷橋壘石猶有存者田薊而諸鎮次
之湖海先豐潤遼陽以東青徐以南次之部耕
卒守墩戍瀕海墩臺兼備倭虜嗟乎張全義屯
洛四十餘年始富饒虞文靖秩富民願耕者其

說不行于秦定造設海口萬戶江南之粟不來
王庭以北使內地法全義塞外法文靖亦何減
史起溉鄴鄭國溉秦文翁溉蜀白公引渭馬援
引洮虞詡浚渠之蹟乎東南賦重粟貴有年頃
者海風大決流殺人民濬吳淞白茆諸江浦入
海尤裕餉救民之上籌也三儲之外無爭尺寸
以開言利之端三儲之內無遺尺寸以蘇軍民
之困俾所儲撫臣道臣壯縣邊縣之令式行之
務令貧弱有利大貪戢而小貪自止故曰欲理

之君閉利門長此不已屯利歸于豪鹽利盡歸
于奸商于貪官于猾吏于游客獨患苦細民煽
亂饑卒至水利罔聞知海風盪決漂溺死亡而
不動謀國如此可謂取人之情者耶善哉劉晏
用士不用吏蘇軾曰朝廷赦吏胥不赦又曰百
萬虎狼在城市噫爲子孫作馬牛不知爲吏胥
作馬牛也又不知爲虎狼作馬牛也宜少自愛
矣文武吏士有儲也自置身于無可欲無敢欲
之地國有儲也置文武吏士于無可欲無敢欲

之地金錢犒死士而軀命報
天子萬年有道
之長必基之矣

論

兵以治爲勝

兵也者將將之任而非一帥之事三代以來將權在上故常治剛中而應行險而順曰師以天下比一人曰比師貴應惟君無弗應也比貴輔惟君無弗輔也古之聰明聖知神武而不殺者猶以此齋戒神明其德焉天地無不戒懼之日在澤則雷在地則雷出地則雷在天下則雷君法天體乾朝乾夕惕人龍處於危地其戰兢一

大淵乎萬國咸寧則是萬國皆以戰兢治其性命也乾上九而亢戰乎乾所以去其亢範六極而弱八曰兵所以去其弱戰不予諸卦予乾皇極尊五之義云是古今必勝常勝之兵君父所獨操者神妙萬物人主提八卦之神卽提萬物之神其陰陽不測在能轉先天爲後天自乾一轉而幹旋天地挽回日月革易山澤呼吸風雷于是戰歸之乾而勞乎坎坎勞卦血卦且戰且勞乾坎相求恒易以知險恒戰以出險爲君難

如此遣將之辭曰上至天下至淵是極深研幾
上懸無極下臨不測之危詞也蓋有治天之師
有治地之師有治人之師堯開天曆象日月星
辰羲和尸厥官亂天故以天治之舜闢地肇州
封山濬川苗民逆命三危既宅三苗丕敘亂地
故以地治之文王止至善立人極卿士非度咈
其耆長旣戡黎祖伊恐亂人故以人治之此三
師者無敵於天下自胤侯一征後王克謹天戒
史官不見郡國以聞郡國不聞史官見之史官

不見郡國言之而萬古之天文治自禹乘四載
所至萊夷作牧和夷底績至兩階既舞三苗丕
敘玄圭乃錫非然聲教弗訖也師歷山崩厖至
誠格之矣而萬古之地理治文王之居坎也若
便安熟習然習坎不已衍爲麗澤忘勞忘死是
以能出乎險難之中爲生民主而萬古之人倫
治文善用易者也操勝于坎離離明者甲冑戈
兵也翕明于內腹乃大敬于離初用晦無咎其
內文明外柔順以艱貞蒙大難者歟旣濟喪菲

而弗逐也柔中之明不顯于二文王以之高世
之功遂成於三武王以之羗里小心則納約之
牖云文不止者也水火不止者也坎居離上水
溢而火怒于下必進之象卽不止之象故濟坎
居離下水涸而火安於上不進之象卽終止之
象故未濟則儲水防火水居火上非思患豫防
終日戒之文德耶戒則爲丈人爲長子不戒爲
小音之揚飛翼之銳棟撓之本未弱而已進退
兵家之恒也盤桓而不動適如而不前班如而

不迫無虞而不卽豈敢勇深入哉而操勝于君
父則無敵之師有必進無一退雖然洗心退藏
吉凶同患愈洗愈退矣愈退愈藏矣愈藏愈密
矣此治心也及其出征不然天上之火遇惡揚
善火師之克伐莽除壙泮至之水常德習教兩
作之離折首正邦太否自根而拔剝復隨念而
移勝在水也能使水居火上勝在火也能使火
土同于天貪昧隱忍人心鬼方幽窟也非高宗
孰伐之大君不去號咷之間三之莽四之壙亦

多矣大君不醒萬方之聾聵子夜之雷不聲雷
不從坎起茫茫長夜矣雷出而萬物生出入無
疾豈待藥哉非七日來復則十年弗征不重其
門不擊其柝復關不閉坎險不守矣果一帥之
任乎哉文王轉先天爲後天而居乾于必戰將
地也居離于南面將幾也居震於東方將聲也
稽首得五臣焉稽詩得二臣焉蠻夷猾夏寇賊
姦宄從欲以治臯陶將之仁陳三風六愆肇修
人紀伊尹將之任于戈省厥躬有備無患傳說

將之豫彝倫攸敘八政首食箕子將之命公孫
碩膚綢繆牖戶周公將之忍無言而愚無筵而
舞無抱子而嬉無蠻作而弓矢衛武公將之智
若否是明王躬是保不以全軀保妻子爲明哲
仲山甫將之德善用師者無所不藏藏于訟自
小言絕之田可無禽矣藏于需自飲食絕之寇
可無禦矣無山下之泉而金夫見無地中之雷
而商旅行藏其義于蒙于復誅貪詐也噫微矣
哉咸練兵之卦也井養兵之卦也兵法不愆于

六步七步乃止齊焉咸其拇志在外而足易動
易動多蹶咸腓咸股士卒動而將心憧憧騰口
說何異兵書煩擾哉坎上之卦八井不言險井
上出爲功泥乎谷乎呼庚癸耳漂乎不食需王
明耳勞民勸相其寓兵于農耶勿幕元吉其井
養不窮耶箕子能用易者也食先而兵後五行
先而三德後德居北是剛中之滙也井泉之溫
寒泉之列也君操勝而必行之貴決係詞十三
卦終夬百官治萬民察以此雜卦終夬剛決柔

君子道長小人道憂以此吳起曰兵以治爲勝將權在人主無弗應也無弗比也一張一弛無弗藏也其在下有疾呼而不應者矣有仵重而不輔者矣有疊恥而不藏者矣商之善用兵也藏于盤庚俾和吉言千百姓周之善用兵也藏于酒誥俾有正有事無彝酒又藏于多士多方俾惟和惟克勤顧天顯民祗皆自其小有言聖之恐一至于用兵而險陷汎濫有不可隄之勢也治天治地治人之師自天子出而將將之權

尊萬世久安長治噫三代以下識此義者蓋有
之未易更僕數也